



# F A C T V M,

*Pour maistre Michel Robichon, Contreroolleur general prouin-  
cial des gabelles en la generalité de Tours, & cy deuant ad-  
indicataire pour les deux cinquiesmes parties du fournissemēt  
du grenier à sel de ladite ville de Tours, & chambres qui en  
dependent, defendeur, appellant & demandeur.*

*Contre Monsieur le Procureur general, demandeur, Iehan Bo-  
bier & Claude du Molin, inthimez audit appel.*



A cause du proces est suscitée par Iean Bo-  
bier, Pierre Iopitre & Claude du Moulin ses  
ennemis capitaux, à sçauoir ledit Bobier pour  
se vanger en la personne dudit Michel Robi-  
chon de ce que maistre Paul Robichon Tre-  
sorier prouincial de l'extraordinaire des guer-  
res en Bretagne son frere, a fait faire le proces  
criminel, & fait pendre l'un de ses compagnons nommé Michel  
Lopin, en la ville de Rennes, au mois de Decembre 1595.  
Et pour raison du mesme fait ledit Bobier a obtenu lettres  
d'abolition lesquelles n'ont esté entherinées, ains seulement  
a esté dit que la Cour l'a eslargi quand à present, à la charge  
de se représenter lors qu'il sera ordonné. Lesdites lettres d'abo-  
lition & arrest avec l'adiournement fait à la requeste dudit  
Robichon audit Bobier sont produites audit deffaut que ledit  
Robichon a obtenu cōtre lesdits Bobier, du Moulin & Drouets  
leur Receueur, sous la cote B. Et de faict encōre aujour'd'huy

A





ledit Bobier qui a donné la sentence d'ôt est appel, sollicite ceste cause & est venu expres en ceste ville à ceste fin, & en fait son propre fait.

Quant à Iopitre qui a informé avec ledit Bobier, le defendeur fait apparoir que lors desdites informations il y auoit proces criminel entre eux, & mesme produit vn decret contre luy donné & signifié à la requeste dudit Iopitre. Lequel depuis voyant qu'il ne trouuoit aucun Iuge qui s'accommodast à ses passions, s'est luy mesme fait Iuge pour se faire la iustice, ou plustost pour se vanger de son ennemy.

Et pour le regard de Claude du Moulin soy disant substitud, il estoit entieremēt de la Ligue, accusé de la conspiration faicte en la ville de Tours contre le seruice du Roy, mené prisonnier par ledit defendeur, par le commandement de messieurs de la Cour de Parlement lors seant à Tours, & de monsieur de Souray gouuerneur dudit païs, comme ayant lors charge & commandement de Capitaine en ladite ville. Et n'est ledit du Moulin sorti qu'avec vn bannissement de ladite ville de dix lieues à la ronde, à peine de la hard, ses complices pendus & estranglez, comme appert par Arrest du dixneuuesme iour d'Aoust, mil cinq cens quatre vingts neuf, produit sous la cotte D. En indignation dequoy, lesdits Bobier, Iopitre & du Molin, ont cherché toutes les occasions de luy nuire, ayant donné vne pretendue sentence du vnzième Decembre quatre vingts dixneuf, & par icelle condamné ledit Robichon, de Moré, Chertier, Cheualier, & la Forest, en la somme de vingtsept mil six cens neuf escuz six sols neuf deniers, à quoy ils disent les dechets de cinquante vn muid cinq septiers deux minots de sel recellé par lesdits officiers du grenier de Tours, reuenir. Et sur ce auoit, Drouëts leur Receueur, decerné vne contrainte par corps, contre ledit Robichon & officiers vn seul & pour le tout, de payer ladite somme, sauf leur recours de l'vn enuers l'autre, & y comprendre ledit Robichon sans l'auoir appelé ne interpellé: sinon leur fut enjoint deux iours auparauant de leur bailler son contreroolle.

Le Conseil trouuera ceste sentence impertinente, les inthimez se fondent sur ce qu'ils disent que par le 18. article des baux desdites adiudications, ils veulent inferer que ledit Robichon



chon & ses associez, sont tenus & chargez de tous les dechets du sel qu'ils feroient descendre audit grenier à sel de Tours & chambres, leur estant accordé par ledit article pour lesdits dechets & aduance qu'ils feront des nouveaux subfides, le parisif.

Mais tant s'en faut, que les adiudicataires soient tenus de ce deschet, que au contraire, le mesme article porte que les adiudicataires payeront les nouveaux subfides créez depuis l'année 1588. qu'ils aduanceront, & que pour ladite aduance & dechet qu'ils pourroient pretendre, ils auront le parisif d'icelle aduance, lesquels nouveaux subfides se montent enuiron vingt quatre escuz pour muid, & ledit parisif, pour lesdites auances & dechet, six escuz, qui n'est l'interest de l'argent, d'autant que lon est deux ou trois ans sans pouuoir estre remboursé.

Dont pour entendre lesdits dechets ils regardent lesdits adiudicataires & à leur preiudice. Comme, s'ils sont charger à Nantes cent muids de sel, il faut qu'ils payent tous les nouveaux subfides de tout ledit nombre, soit à Nantes, Ingrande que autres lieux, comme il est porté par les breuets : & à la descende & vente dudit sel au grenier de Tours, dudit nombre de cent muids il ne s'en trouue que le nombre de quatre vingts douze muids. Asçauoir quatre muids de tare pour les deschets du voiturier, & quatre autres muids pour les dechets du grenier. Iusques à la vente desquels huit muids, qui ne sont plus, lesdits adiudicataires en ont payé tous lesdits nouveaux subfides cōme de l'autre sel : & neantmoins ils n'en auront aucun remboursement ne recompense, & est ledit dechet porté par ledit article. Car si ledit deschet n'estoit limité lesdits adiudicataires auroient recompense d'iceluy sur le Roy, comme de l'autre sel descendu & vendu. Et si le dire desdits Bobier & du Moulin auoit lieu, que lesdits marchans adiudicataires fussent tenus de payer tous lesdits deschets tant des voitures que vente, il faudroit qu'ils payassent plus de deux cens cinquante escuz pour muid selon & au prix qu'il se vend au grenier, & n'auoir de recompense, que six escuz pour muid, tant pour l'interest de leur argent que dechets, qui eust esté le marchand qui eust voulu prendre tels fourniffements : ce qui ne peut estre, & seroit contre les ordonnances & articles des baux.



Dauantage par les mesmes baulx à la fin d'iceux, article 21. il est expressement dit que lesdits adiudicataires ne seront aucunement tenus des dechets de tout le sel qu'ils feroient descendre aux greniers, & silence imposée à ses Procureurs généraux & substituds de les en inquieter ne rechercher. Et precedemment au 14. art. contenant que les Officiers sont responsables des dechets extraordinaires.

Que si aucun dechet se trouue, lesdits Officiers en doiuent respondre & non ledit Robichon, qui ne s'en trouuera chargé en quelque qualité que lon le prenne, soit de Contreroolleur des gabelles ou d'adiudicataire. Et quand lon voudroit pretendre les adiudicataires y estre tenus, que non, ledit Robichon ne le peut estre, n'ayant oncques eu aucune clef dudit grenier, ne commis, choses necessaires pour vn grand fournissement, ne l'ayant à faire aussi ledit Robichon que fort petit.

Au contraire c'est ledit Robichon qui a vn particulier & notable interest au dechet extraordinaire dudit sel, ou à celuy qui seroit venu dont ne seroit rendu comte, ayant droit de prendre sur chacun muid enuiron trente deux escus, qui seroit le desrober d'autant parmi l'interest du Roy. Et pour ce regard il entend se ioinde avec M. le Procureur general, & conclud audit cas de faute de redition de compte, que lesdits Officiers soient tenus luy payer ledit droit, & outre en ses depens, dommages & interests.

Sera à noter que en l'information faite par Monsieur Bigot Contreroolleur general des gabelles de France, le septiesme d'Aoust quatre vingts dixhuiet, à la requeste de Iehan & Christophle Ducs, Iacques Porcher & Pierre Durand, ouïs en icelle contre lesdits Officiers, ne parlent nullement dudit Robichon, comme n'estant du fait par eux déposé & n'en ayant eu aucune cognoissance. Et neantmoins, par l'information depuis faite au mois de Nouembre ensuiuant par lesdits Bobier, Iopitre, & du Moulin, à l'encontre d'iceux Officiers, à la requeste desdits Ducs, ils interrogent les mesmes tesmoins desnommez en ladite information faite par ledit Sieur Bigot, & par icelle leur font dire & nommer ledit Robichon avec lesdits Officiers. Qui est vne fauceté prouenante de l'inimitié conceüe contre ledit Robichon, ayant suscité & poursuyui lesdits tesmoins, à  
dire



dire & déposer faux:estât la maxime telle qu'on se doit arrester aux premieres depositions rendues par les tesmoins , & non aux secondes faites par lesdits Bobier , Iopitre & du Moulin. Encores que d'ailleurs ce ne sont tesmoins , ains parties accusantes , qui ont fait la faute dont est question au proces , qu'ils ont voulu reietter sur ledit Robichon.

Et pour monstrier & iustifier que le sel pris sur lesdits Porcher & Durand , la nuit d'entre le 21. & 22. iour du mois de Iuillet precedent , par Pierre Fauereau & Pierre Lascéré archers dudit grenier , auroit esté mis & descendu au grenier à sel de Lâgés , il en appert par le proces verbal desdits Archers , produit par lesdits Cheualier , la Forest & Billard , en leurs premieres productions , sous la cote O. avec l'audition , & interrogatoire desdits Porcher & Durand sur ladite prise & en laditte cote.

Aussi se iustifie comme ledit sel mis en ladite chambre de Lâgés au nombre de quinze septiers , auroit esté mis & employé sur le registre des ventes dudit grenier à sel de Tours , produit par les susdits officiers en leur dite premiere production , sous la cote O. au troisieme registre à la fin diceluy qui auroit esté arresté & signé dudit Bobier , le 15. d'Octobre ensuyuant , & par lequel il appert que ledit sel estoit en essence & n'estoit vendu.

Dauantage , lors que ledit Robichon est sorty de son bail qui fut le dernier iour du mois de Septembre 1588. tout le sel qui estoit au grenier dudit Tours & chambres , auroit esté mesuré particulièrement en chacun grenier par lesdits Officiers , en presence du nouveau adjudicataire , mesmes en celuy dudit Langés , où il se seroit trouué enuiron neuf septiers de sel qui restoit du fournissement dudit Robichon & ses associez. Et outre , fait mesurer ledit nombre de quinze septiers de sel de capture prins sur lesdits Porcher & Durand , & sorty des Basteaux desdits Millet , Guichard , & Chauueau , & dont ledit Moreau adjudicataire auroit esté chargé.

Qui est bien pour monstrier que ledit Robichon nes'est voulu applicquer ledit sel à son profit , estant entré au grenier & fait estat & registre diceluy , & baillé és mains dudit Moreau , nouveau adjudicataire , comme dict est , ainsi que lon a accou-



flumé faire, & par tant on ne le peut accuser d'aucune coulpe.

Et quant à ce que lesdits Bobier, Iopitre, & du Moulin ont voulu faire croire au Conseil, que la charge de Contreroolleur dudit Robichon, estoit d'auoir l'œil sur les abbys & maluersations que les Officiers des gabelles & autres pouuoient commettre au sel, il se void que par l'Edit de creatiō des Offices de Contreroolleurs generaux prouinciaux des gabelles, lesdits Estats ont esté créez à l'instar des Contreroolleurs generaux des finances au mois de May 1594. Pour auoir l'œil à la recepte & depense faite par les Receueurs generaux des gabelles, & non à autre effect, comme appert par ledit Edit & lettres de prouision dudit Robichon produit en la deuxiesme production sous la cotte A.

Et pource, mal à propos lesdits Bobier & consorts, donnent audit Robichon qualite de Contreroolleur des gabelles & grenier à sel, car il estoit Contreroolleur general Prouincial des gabelles en ladite generalité, dont le different est grand, veu que l'office de Contreroolleur general des gabelles ne l'astraint sinō de contreroller ce qui est porté par les Receueurs particuliers en la recepte generale, sans rechercher s'il y a eu abus commis aux greniers ou non. Et de fait en l'an 1577. les offices de Contreroolleur Prouincial des greniers à sel furent créez, pour auoir l'œil sur les abus & maluersations, & l'office dudit Robichon a esté seulement créé au mois de May 1594. à l'instar des Contreroolleurs des Finances, comme apert par la teneur de l'Edit.

Ce qui est iustificié, car ledit Robichon n'a esté receu audit estat que le septiesme d'Aoust 1596. & installé le vingtsixiesme dudit mois, & joui d'iceluy jusques à la fin de Decembre ensuyuant, qui sont quatre mois. Et son compagnon d'office, qui a joui & exercé sondit Estat depuis la creation d'iceluy, iusques au vingtsixiesme dudit mois d'Aoust audit an 1596. Et outre, l'année suyuant 1597. qu'il auroit exercé sa charge seulement pour le regard des deniers qui ont esté portez en la recepte generale par les Receueurs particuliers desdits Greniers, sans s'esmaniciper ny auoir l'œil à autre chose, aussi son pouuoir ne s'estendoit dauantage, & à la fin de l'année 1598. lesdits Officiers tant Receueurs, que Contreroolleurs generaux & particuliers, auroient esté supprimez.

Et



Et où il y eust eu lieu de faire aucune recherche, que non, cōtre lesdits Contreroolleurs generaux Prouvinciaux, lesdits Bobier & du Moulin se deuoient plustost adresser à l'ancien Cōtreroollleur general nommé Maistre Jean Boilleau, qui auoit iouï quatre ans & plus, & non audit Robichon qui auroit iouï seulement quatre mois.

Dauantage, les inthimez disent qu'il y a eu quelque prise de sel, faite pendant les recherches, mais elle appartient aux marchans adiudicataires, pour l'aduanee des frais qu'ils font en la recherche, & ainsi le veut l'ordonnance du Roy Henry III. donnée à Paris, au mois d'Aoust 1579. art. 14. & 27. qui porte ces mots. *Les marchans adjudicataires de nos greniers seront sommez de faire par chacun an les recherches au ressort de leursdits greniers. Et enjoignons aux Officiers desdits greniers d'y vacquer diligemment, & toutes choses cessantes, aux despens raisonnables desdits marchans: à quoy faire toutefois ils ne pourront estre contraints. Et en cas que lesdits marchans voulussent faire lesdites recherches à leurs despens, ils prendront à leur profit toutes les amandes, confiscations du sel & cheuaux, qui seront adjudgées par lesdits Officiers.*

Outre l'ordonnance qui est generale, lesdits adjudicataires ont particulièrement obtenu lettres patentes de sa Majesté le huitiesme Mars 1597. verifiées où besoin a esté, par lesquelles sa Majesté declare que sur le sel de capture, il y prendra ses droits comme sur celuy des gabelles, excepté sur cinq muids lesquels il laisse aux adjudicataires pour la conseruation desdits greniers & pour subuenir aux frais. Lesdites lettres patentes sont produites par ledit Robichon sous la cotte B.

Que s'il s'est comporté suyuant l'ordonnance & suyuant les lettres patentes, il n'en peut estre repris. Mais il passe plus outre, & offre que le Roy prenne ses droits sur tout le nombre de sel, & qu'il soit remboursé, des frais qu'il a faits à la poursuite & recherche desdites prinſes & captures de sel.

Que si quelques tesmoins deposent cōtre la verité de ce que dessus, ce sont tous faux tesmoins, instiguez par les ennemis du dit Robichon: & ainsi Monsieur le Commissaire le lugea, enuoyant en prison la plus part desdits tesmoins comme Vrbain Poirier, Thomas Mortier, Martin Ferrand, & autres. Et pour monſtrer leur fauceté, le Conseil remarquera que deux, l'un  
nommé



nommé Charles Millet l'autre Ieā Guichard, declarēt que Robichon & lesdits Officiers estants assemblez chez vn nommé Houdry, exigerent desdits tesmoins deux muids de sel ensemble quelque sommes de deniers, & tant s'en faut qu'ainsi soit que l'appellant en ce temps auoit la iambe rompuë, & demeurera malade au liēt depuis le mois de May iusques en Aoust, ce qu'il offrit de verifier pardeuant Monsieur le Commissaire, ce que ledit Sieur Commissaire n'ordonna, dautant qu'il estoit sur son partement: & encores aujourd'huy, l'appellant fait offre de le verifier. Mesmes lesdits Officiers, estants ouïs deuant ledit Sieur Commissaire, declarerent que ledit Robichon n'auoit esté chez ledit Houdry & qu'il estoit malade. Il ne touche point dauantage les reproches desdits tesmoins, il supplie humblement le Conseil d'y vouloir auoir egard, esperāt qu'elles seront iugées pertinentes, & lesdits tesmoins faux.

